



[Experts](#)

Setiap perkara ada harganya: Hakikat kehidupan yang wajar dihayati

Dalam kehidupan ini, tiada sesuatu pun yang datang secara percuma. Setiap perkara menuntut harga yang perlu dibayar. Sama ada dari sudut masa, tenaga, wang ringgit, kesabaran atau pengorbanan, semuanya ada nilainya. Pepatah 'setiap perkara ada harganya' membawa maksud yang luas. Ia bukan sekadar berkaitan wang, tetapi mencakupi seluruh aspek kehidupan seperti kejayaan, kegagalan, kebahagiaan dan pengorbanan.


Kita sering melihat orang berjaya lalu berfikir bahawa kejayaan itu datang dengan mudah. Hakikatnya, di sebalik setiap kejayaan terdapat usaha, keletihan dan masa yang dikorbankan. Untuk berjaya dalam pelajaran, seseorang perlu berdisiplin dan rajin mengulang kaji. Tidur dikurangkan, masa santai dikorbankan, dan kesungguhan perlu dikekalkan. Itu harga yang perlu dibayar untuk mencapai cita-cita.

Begitu juga dengan kesihatan. Ramai menginginkan tubuh yang sihat dan bertenaga. Namun, kesihatan tidak datang tanpa usaha. Harganya ialah disiplin menjaga pemakanan, bersenam secara konsisten dan menjauhi tabiat buruk seperti merokok atau berjaga malam. Jika harga ini tidak dibayar, kesihatan akan menurun dan penyakit menjadi bayaran yang tidak diinginkan.

Setiap perkara ada harganya

Tiada kejayaan tanpa usaha.

Tiada kemajuan tanpa pengorbanan.



“Apa sahaja yang berbaloi dimiliki,
berbaloi untuk diperjuangkan.”

Dalam dunia pekerjaan, kejayaan kerjaya juga mempunyai harganya. Untuk menjadi pekerja cemerlang, seseorang perlu berkorban masa dan tenaga. Kadang-kadang perlu mendahulukan tanggungjawab daripada keselesaan. Namun, harga itu berbaloi jika dibayar dengan niat yang betul. Ia membawa pengalaman, kemahiran dan rezeki yang halal.

Dalam skala yang lebih besar seperti politik dan pentadbiran negara, harga kepimpinan jauh lebih tinggi. Seorang pemimpin yang amanah perlu meninggalkan keselesaan peribadi demi rakyat. Dia perlu membuat keputusan yang mungkin tidak disukai, menolak godaan rasuah dan mengawal diri daripada penyalahgunaan kuasa. Semua ini menuntut kekuatan moral yang tinggi. Itulah harga sebenar kepada amanah kepimpinan.

Rakyat juga mempunyai harga yang perlu dibayar untuk kestabilan dan kemajuan negara. Harga itu ialah tanggungjawab memilih pemimpin yang jujur, membayar cukai, mematuhi undang-undang dan terlibat dalam aktiviti kemasyarakatan. Jika rakyat cuai dalam tanggungjawab ini, negara akan menanggung harga yang lebih besar dalam bentuk ketidakstabilan dan kehilangan kepercayaan.

Namun, tidak semua harga itu berbaloi. Kadang kala manusia membayar terlalu mahal untuk sesuatu yang tidak sepatutnya. Ada yang sanggup mengorbankan maruah, prinsip dan nilai moral demi kemewahan atau kuasa. Akhirnya, mereka hidup dalam tekanan, kehilangan diri dan dihantui rasa bersalah. Kekayaan tanpa ketenangan bukan kejayaan. Kuasa tanpa integriti bukan kemenangan. Maka, kita perlu menilai semula harga yang sanggup kita bayar agar tidak terjebak dalam kerugian yang tidak nampak.

Konsep 'setiap perkara ada harganya' juga mengajar kita untuk bersyukur. Apabila melihat kejayaan orang lain, jangan hanya melihat hasilnya. Lihat juga perjalanan dan pengorbanan di sebaliknya. Dengan cara itu, kita belajar menghargai usaha sendiri tanpa rasa iri hati. Kita juga akan lebih memahami bahawa setiap orang membayar harga yang berbeza untuk mencapai impian mereka.

Kadang kala kegagalan juga merupakan harga kepada kematangan. Ia memberi pengalaman dan mengajar kita tentang batas kemampuan diri. Kegagalan bukan hukuman, tetapi pelajaran yang perlu dibayar untuk mencapai kebijaksanaan. Orang yang gagal tetapi bangkit semula sebenarnya sedang membayar harga untuk menjadi lebih kuat.

Dalam dunia moden yang serba cepat, ramai mahu berjaya tanpa melalui proses yang panjang. Ada yang mencari jalan pintas untuk mendapat kekayaan dan pengaruh. Namun, sesuatu yang diperolehi tanpa usaha jarang kekal lama. Kejayaan yang terbina dengan sabar dan jujur lebih kukuh dan diberkati. Alam ini bergerak dengan hukum keseimbangan. Segala yang bernilai memerlukan usaha dan masa. Itulah harga yang tidak dapat dielakkan.

Kita juga perlu sedar bahawa harga sesuatu perkara tidak selalu sama bagi setiap orang. Ada yang membayar dengan masa, ada yang membayar dengan tenaga atau perasaan. Seorang ibu membayar harga kasih sayang melalui pengorbanan. Seorang guru membayar harga kejayaan anak muridnya dengan kesabaran. Seorang petani membayar harga hasil tuaian dengan keringat. Semua ini adalah harga kehidupan yang membina masyarakat.

Kehidupan yang baik bukanlah kehidupan tanpa harga, tetapi kehidupan yang dibayar dengan nilai yang betul. Jika harga yang dibayar membawa kebaikan kepada diri, keluarga dan masyarakat, maka ia wajar. Namun, jika harga itu merosakkan jiwa dan maruah, maka ia terlalu mahal. Kita perlu bijak memilih apa yang ingin dimiliki dan apa yang sanggup dikorbankan.

Sebagai penutup, renungilah bahawa setiap pilihan datang bersama harga yang perlu dibayar. Kita tidak boleh memiliki semuanya tanpa pengorbanan. Pastikan harga yang dibayar memberi manfaat jangka panjang. Jangan sampai kita membayar dengan kebahagiaan, kesihatan atau maruah demi sesuatu yang sementara. Hargailah apa yang dimiliki dan berusahalah dengan jujur untuk memiliki apa yang diimpikan.

Dalam kehidupan ini, tiada yang percuma. Setiap perkara ada harganya. Bayarlah dengan jujur, dengan usaha, dan dengan niat yang bersih. Hanya dengan itu kita akan merasai makna sebenar kehidupan yang berkat dan bermakna.



Oleh: Ahmad Ibrahim

E-mel: ahmadbi@umpsa.edu.my

Penulis adalah Pensyarah, Pusat Sains Kemanusiaan (PSK), Universiti Malaysia Pahang Al-Sultan Abdullah (UMPSA).

Rencana ini merupakan pandangan peribadi penulis dan tidak menggambarkan pendirian rasmi Universiti Malaysia Pahang Al-Sultan Abdullah (UMPSA).

• 104 views

[View PDF](#)

